

L-cornie tel Lázaro

1. Tilcet il-šitvie mfárise u canta l-sayf faði
smacu aššik kam il-Lázaro u rijce ɣalf mill Aði
2. L-riɣe kantír il-ðéɣinna u l-ruɣ kant mplane farɣa
Ntɣawšu jumpi minxók minni tantsalli aði l-varka
3. Ttapti alok takuyθkon u ftaxu kaes ðanekon
Tattácirfu ayšo ta sar ta má kišcú canekon
4. L-Lázaro kanyaɣlak mnaɣxóst il-Viθania
Kallú ɣnayn pnatukya ɣvat il-Marθa u l-Maria
5. L-Lázaro miski ɣal i-ɣpir u má tavel temut
u xvatu necipnu xnayton u tlaffu xost il-sut.
6. Lli-Mpsiɣ kan cep pcit i-ɣtir fi eɣte oɣre Mtine
Ma ll-Apostolus ta kallú u ma caripe oɣre tinye
7. Xapár šiikutši má kallú lli-Mpsiɣ mpšan lli-rfik telu
Ost ta ɣilkúɣ lli-ɣnayn ɣvat tilpullu “jru u elu”
8. Marθa jirket sop illi-Mpsiɣ ɣiðnit u kantiɣpillu
Xamnet u vakcet ɣost illi-jreɣ ma tnuvox kantaɣkillu
9. **(Marθa)** Kifta má kunt anaɣxullá ya Rabbí tatsacitu
Pácaref kif rfikak kanteciš an kunt axxulla cintu.
10. **(Maria)** U alok int amma pitrí mil Rabbi tlop tesacet
Mil mawt terajɣu ɣalf , tekúm mi ta kan maet...
11. **(Mpsiɣ)** Men pisaddíkinni aš fkul mawt má lu fi l-cištu
Ttekumu ɣok il-maytín, aða pitsaθku intu?
12. **(Marθa u Maria)** Mantsaddek u ttancaet štit, tattismca l-tinye kulla.
Int illi-Mpsiɣ tel Rabbi ll-ipn, pitríz il-tinye kulla.
13. **(Mpsiɣ)** Alok lli-rfiki l-Lázaro, kúlunni ayn uo?
Xútunni jump mpšan tákišcu u teismácani vuo.

14. Meşkin illi-xnayn tacantu kintam kanu Marθa u Maria
u χalfon meşi kan Ili-Mpsiχ u χilku I-Viθania.

15. U kallon alok illi-Mpsiχ I-χajra tekaymua
teiftaχ il-kapr tel Lázaro I-vasie teisemcua

16. Caet illi-Mpsiχ ma χiss i-ştit u fi I-nuss ntşakket I-xajra
«Kom χok u mψi ya Lázare u páninna alok parra»

17. Mψik il-parke kam il-Lázaro,parra tilce mil kapru
mill Ađi rijce mi ta kan il-Rabb savallu xatru

18. **(Kullon ill-ulat)** Kuyinna Lázare, aş kşacat fi I-oχre I-tinye ta ukacat?

19. **(Lázaro)** Rayt fazca, rayt pike, rayt vajca u δulme mcike
Tuni fitte moe taşrap, Il-okít tantfi ta pittaxrak

20. U kallon alok illi-Mpsiχ teχullu jreχu u teχu
U χarap vaχtu mψşan terúχ telaki rfaku u Il-eχlu

21. Aşka ma kanu aχχullá kişcu aş sar u saδku
I-Rabb kullon kanyişikru mψşan I-θamma kanyaxku...!!!

22. Snin χtir tatcişu kuyθkon u intu u ulatkon
I-Catra şaytna u Ili-Mpsiχ tesallu kullu mψşankon
u I-Lázaro I-kaddís teintor ill-ulatkon